

草庐吴文正公全集

華唐吳文正公全集

草廬吳文正公集卷之四十四

祭文

國子學告揭大成新扁文

維京師立先聖廟既落成之二年今天子嗣位乃加封
大成之號恭惟先聖道德高厚與天地參爲萬世帝者
師聖君賢相於位號廟祠務致崇極以風四方廟之堂
曰大成之殿廟之門曰大成之門雖因前代之舊然大
成二字寔今天子所賜扁以斯名施之於今尤爲宜稱
日吉辰良爰揭新扁于殿之前門之外俾尊慕先聖入
其門升其堂者得所瞻仰焉謹以縉牲醴齊用伸虔告

王其鑒之

祭周元公濂溪先生墓文

嗚呼悟道有初適道有途先生之圖先生之書昭示厥
初維精匪粗坦闢厥途維約匪紆人生而靜所性天性
物感而動所用天用未量布帛分寸在度未程重輕銖
兩在衡風雖過河河弗興波形雖對鏡鏡弗藏影動而
凝然靜而粲然唯一故直惟一故專道響絕絃千數百
年學要一言洙泗直傳有性無欲有一無二猗嗟效顰
久莫克至先生之道萬世杲杲展拜墓前如親見焉廬
山峙南大江流北仰之彌高逝者不息

慈湖丁蘭廟祝文

歲在丁亥十月丙寅前鄉貢進士江西撫州吳澄謹昭
告于丁侯大神澄自少讀書粗識義理見有厚於人倫
者雖不同世心慕其人惟侯事親不失子道澄去冬經
過式瞻廟貌疇昔之夜夢祇見于侯執紙幣以贊歸舟
泊祠下敬惟往夢是踐澄去家期年今歸省母舟沂流
而上祈得順風而無驚虞以早達于家神其保佑之

祭樂安縣丞黃從事文

嗚呼公生於梁長於梁老於楊卒於楊其質厚其氣剛
其守定其行方始也辟地出蜀而遊終也辟世入山而

幽出蜀伊何崎嶇萬里縈身以去就祿而仕入山伊何
優游卒歲儉德以處得正以斃辟地以生陳子之清辟
世以死張子之寧清則雖生而不辱寧則雖死而猶榮
初予識公于通守之庭聞公爲當代鉅人所敬聽其言
論風旨於是而信公之名旣而從公於貳令之廳見公
爲一邑士民所愛視其兩事設施於是而得公之誠曾
幾何時風震雨凌公於斯時蟣蝨小官蹇蹇于下事不
辭難又幾何時地陷天傾公於斯時螻蟻微軀行行于
中義不受污嗚呼平居無事凡百有位銜才華矜科第
挾崇高夸寵利憑跋萬民傲睨舉世及至一旦茫無寸

計臨難苟免從風披靡自詭龍蛇不愧犬豕胡爲乎寒
松勁草之心乃見於下邑庶僚之底如公之志有隕無
二如公之節霜嚴日厲人知公禍福不動爲一時之勇
孰知公完養有素非一朝之故公之劬書嗜學寒暑不
廢每蹙然於芳草之艾蕭公之安貧守賤表裏一致常
怡然於陋巷之簞瓢公之好賢樂善心口嘆喟恨不卽
上之青霄公之憤世嫉邪辭色峻厲恨不卽肆之市朝
逮祈死之不得慨偷生之不聊爰投迹於魑魅任爭席
於牧樵憂患之端殆無時而不有勁直之氣不與累而
俱消外無撓而力毅內有主而神全惟其所稟之異所

學之正是以雖老益壯雖窮益堅聖人未見剛者如公
庶幾焉嗚呼知公惟予知予惟公今其逝矣欲見何從
有山崇崇有水溶溶今其藏矣哀慟何窮冥冥潛德凜
凜高風一觴永訣尙鑒哀衷

祭危先生文

嗚呼昔予弱歲初識先生端方之質敦篤于行日在程
門可幾彥明事徽庵翁雖壻猶子翁旣無後悉意經紀
嫁其孫女與子一視翁之同宗旣貴旣豐尊禮先生靡
替有崇館置于塾十諮九從予時往來每見益親學不
衰倦知識日新沉潛邃密閭閻恂恂下逮末術鳥袖熊

經亦所深嗜以衛其生嗚呼先生宜享遐齡如何如何
一疾弗救年踰七十豈不謂壽宿學彫落予心寔疚聞
訃之初身寄逆旅絕學如綫予復誰語幾更旬朔始昇
柩前魂兮何之涕泗漣漣嗚呼

祭外舅余東齋先生文

嗚呼翁年六十有七未至於耄且耄也翁之精神志氣
未至於昏且耗也翁之起居飲食未減於壯且少也去
夏得疾其端甚微人莫之告澄莫之知逮乎有聞凜乎
有疑秋杪澄始往省專付之醫而醫曰可爲也去冬力
疾其出豈宜藥莫或繼病莫或支雀鼠攬懷風雪侵肌

歲杪澄又徃省重責之醫而醫曰未危也正月于役數
月于違意翁介疾有喜可必其期也孰謂凶計遠馳竟
至於斯也嗚呼翁之意度翁之文詞篤志好學老而弗
衰炳炳于甲寂寂于施表表于鄉昧昧于時是則大運
所同而非獨翁一身之私也舉世所慨而非獨澄一人
之所悲也澄寔無似翁妻以子翁今已矣莫之起矣疾
弗躬侍喪弗躬事庵忽再朔始舁靈几疾首痛心有淚
如洗嗚呼死者其有覺乎翁其能如昨乎死者其可作
乎翁其將焉託乎嗚呼哀哉尙享

祭張達善文

猗歟朱子訓釋四書微辭密意日星炳如紛紛末學經
笥文藻而於本原或昧探討卓哉張君學有正傳章句
義理究索精專講說鋪陳敷暢厥旨抑揚翕張聳動群
耳公侯之門賓師之尊始終情義彌久彌敦晚官魯洙
文客于衛而詵詵游從濟濟受讀歸來淮土妙運誨規
有言于朝將升冑闈如何如何天不壽道忽此棄遺曾
未耄老昔遊白下及上君堂今滯儀鑾君喪已祥遙瞻
獨岡墓長宿草進拜遺像涕隕心悵學之不墜允也不
忘愴焉一奠以寓哀傷尙享

祭鄒居士文

嗚呼予觀聖門之論君子懷德懷刑二端而已其懷德也於處善循理秉義守禮所樂所喜勉勉操履如嗜甘美其懷刑也於傾險譎詭放僻邪侈所畏所耻惴惴謹避如蹈火水維此二端夫孰能然求諸今之人居士公有焉故公之在世也七十二年不尤於人不愧於天內有懿行外無瑕愆予之迂踈衆所共愚締交之初一見心孚蓋嘗與予夜半不寐靡所不談靡所不議忘倦忘疲深悅深契忽然興喟曰惟我與爾使居今世人人若是則官府可廢法禁可弛追思是時予年二十四今又三十四年矣公乃棄予而死嗚呼已矣予復奚言惟上

存淺土之喪下闕承家之孫此公之生而不置懷於朝
夕死亦不瞋目於九原也雖然天者不可知人者猶可
期予當告公之子以卒公志以滿公意公亦可以翛然
長逝而無芥蒂於斯嗚呼哀哉尙享

祭祝靜得提舉文

猗嗟夫君如瑜如珣如蘭如芝如鳳如麟初賓淮甸繼
宦江濱所至所歷與物爲春吾聞其風未見其人拙疎
繆悠垂老乃仕與君交承自覺形穢南還一年爰始通
使西遊數月音問莫嗣道中計傳疑駭驚悸公牘促行
遽信其然發書旅次汗淚交漣惻愴未已趑趄不前緘

辭絮酒亟奠几筵悵悵目送秋水長天尙享

祭袁主一文

嗚呼吾兄遽至是邪與兄同里如同一家後締婣親交
誼愈密合如符契固若膠漆予之中子兄之爰壻年未
三十不幸夭逝予罹此凶兄寔不愉會未再期兄亦棄
予予留京師聞訃哀惶望門一慟情莫能達數千里外
緘此哀辭辭促意長泣涕漣漣

祭夏幼安文

嗚呼以吾友朋明悟之質和粹之氣深沉之量重厚之
器宜其得於天者既豐且脩胡爲嗇於壽而不假之以

年歲也嗚呼吾友卓爾殊異齊諸輩儔寡所匹儷方其
少也於親孝敬於長順悌恪共子職克承考志如新磨
之劒匣藏未試炳炳輝輝微見鋒銳及其長也父喪旣
畢家業益熾田疇廣闢積貯贏利如源泉之水春流方
至汨汨滔滔莫測涯涘其壯而學也脫畧凡近超絕造
詣忘筌蹄於章句探奧窔於理義未嘗執筆求工於文
辭未嘗挾冊求多于誦記而施於今者粲然可觀而師
於古者脗若冥契其疆而仕也觀天光於上國覲日角
於潛邸攀龍附鳳於翕歛化鯢爲鵬於尺咫由布衣而
七品出玉音之特旨時宰下禮於其廬貴游願交者無

既騰焰焰於北方冠總總之南士彼商財而計勢汗流
頽而頽泚嗚呼吾友衆美攸萃言溫雅而中倫容安詳
而合軌聞者稱揚見者嘆喟嗚呼吾友而止於是予於
今春移疾去位吾友南還同舟共濟予於江干數月淹
滯吾友前邁旋即官次比于及家秋聿云季吾友謁告
自官來憇微恙遽感良藥亦瘳日望其痊豈意長逝病
弗及問歛弗及視去者日遠來者日駛袞袞劇痛洒洒
哀淚嗚呼吾友竟至於此命也奈何奚怨奚慰賢母有
命俾淑而嗣疇昔交情罔間生死有不盡心幽顯負媿
一酌几筵鑒予意

祭董平章文

自聞公喪亦旣逾年始得致清酌庶饌之奠于公之祠
前惟公堅剛之質勁直之氣廉正之操果毅之才如金
百鍊不可少摧如矢一發不可少回如喬岳之崔嵬如
洪流之礪礪見義必爲不顧身之利害而移見賢必敬
不因人之毀譽而疑其嫉惡也如仇其好善也如飴勲
閎巍巍而恂恂文儒之施設英邁堂堂而循循理法之
繩規蓋其稟於天者旣異而其得於學者又足以栽培
滋漑而有所裨故能特立獨行表表於天下而視世之
依阿漑忍閹然取媚者如清泉湜湜之不滓於汙泥某